

# יונה

<sup>1</sup> ויהי דבר-יהוה אל-יונה בן-אמתי לאמר: <sup>2</sup> קום לך אל-נינוה העיר הגדולה וקרא עליה כי-עלתה רעתם לפני: <sup>3</sup> ויקם יונה לברח תרשישה מלפני יהוה וירד יפו וימצא אניה באה תרשיש ויתן שכרה וירד בה לבוא עמהם תרשישה מלפני יהוה:

<sup>4</sup> ויהוה הטיל רוח-גדולה אל-הים ויהי סער-גדול בים והאניה חשבה להשבר: <sup>5</sup> וייראו המלחים ויזעקו איש אל-אלהיו ויטלו את-הכלים אשר באניה אל-הים להקל מעליהם ויונה ירד אל-ירכתי הספינה וישכב וירדם: <sup>6</sup> ויקרב אליו רב החבל ויאמר לו מה-לך נרדם קום קרא אל-אלהיך אולי יתעשת האלהים לנו ולא נאבד:

<sup>7</sup> ויאמרו איש אל-רעהו לכו ונפילה גורלות ונדעה בשלמי הרעה הזאת לנו ויפלו גורלות ויפל הגורל על-יונה: <sup>8</sup> ויאמרו אליו הגידה-נא לנו באשר למי-הרעה

הזאת לנו מה־מלאכתך ומאין תבוא מה ארצך ואי־מזה  
עם אתה: <sup>9</sup> ויאמר אליהם עברי אנכי ואת־יהוה אלהי  
השמים אני ירא אשר־עשה את־הים ואת־היבשה: <sup>10</sup> וייראו  
האנשים יראה גדולה ויאמרו אליו מה־זאת עשית כי־ידעו  
האנשים כי־מלפני יהוה הוא ברח כי הגיד להם: <sup>11</sup>  
ויאמרו אליו מה־נעשה לך וישתק הים מעלינו כי הים  
הולך וסער: <sup>12</sup> ויאמר אליהם שאוני והטילני אל־הים  
וישתק הים מעליכם כי יודע אני כי בשלי הסער הגדול  
הזה עליכם: <sup>13</sup> ויחתרו האנשים להשיב אל־היבשה ולא  
יכלו כי הים הולך וסער עליהם: <sup>14</sup> ויקראו אל־יהוה  
ויאמרו אנה יהוה אל־נא נאבדה בנפש האיש הזה ואל־תתן  
עלינו דם נקיא כי־אתה יהוה כאשר חפצת עשית: <sup>15</sup> וישאו  
את־יונה ויטלוהו אל־הים ויעמד הים מזעפון: <sup>16</sup> וייראו  
האנשים יראה גדולה את־יהוה ויזבחו־זבח ליהוה וידרו  
נדרים:

<sup>1</sup> וימן יהוה דג גדול לבלע את-יונה ויהי יונה במעי הדג  
שלשה ימים ושלשה לילות: <sup>2</sup> ויתפלל יונה אל-יהוה  
אלהיו ממעי הדגה: <sup>3</sup> ויאמר

קראתי מצרה לי אל-יהוה ויענני

מבטן שאול שועתי שמעת קולי:

<sup>4</sup> ותשליכני מצולה בלבב ימים ונהר יסבבני

כל-משבריך וגליך עלי עברו:

<sup>5</sup> ואני אמרתי נגרשתי מנגד עיניך

אך אוסיף להביט אל-היכל קדשך:

<sup>6</sup> אפפוני מים עד-נפש תהום יסבבני סוף חבוש לראשי:

<sup>7</sup> לקצבי הרים ירדתי הארץ ברחיה בעדי לעולם

ותעל משחת חיי יהוה אלהי:

<sup>8</sup> בהתעטף עלי נפשי את-יהוה זכרתי

ותבוא אליך תפלתי אל-היכל קדשך:

<sup>9</sup> משמרים הבלי-שוא חסדם יעזבו:

<sup>10</sup> ואני בקול תודה אזבחה-לך

אשר נדרתי אשלמה ישועתה ליהוה: <sup>ס</sup>

<sup>11</sup> ויאמר יהוה לדג ויקא את-יונה אל-היבשה: <sup>פ</sup>

<sup>1</sup> ויהי דבר-יהוה אל-יונה שנית לאמר: <sup>2</sup> קום לך אל-נינוה העיר הגדולה וקרא אליה את-הקריאה אשר אנכי דבר אליך: <sup>3</sup> ויקם יונה וילך אל-נינוה כדבר יהוה ונינוה היתה עיר-גדולה לאלהים מהלך שלשת ימים: <sup>4</sup> ויחל יונה לבוא בעיר מהלך יום אחד ויקרא ויאמר עוד ארבעים יום ונינוה נהפכת: <sup>5</sup> ויאמינו אנשי נינוה באלהים ויקראו-צום וילבשו שקים מגדולם ועד-קטנם: <sup>6</sup> ויגע הדבר אל-מלך נינוה ויקם מכסאו ויעבר אדרתו מעליו ויכס שק וישב על-האפר: <sup>7</sup> ויזעק ויאמר בנינוה מטעם המלך וגדליו לאמר האדם והבהמה הבקר והצאן אל-יטעמו מאומה אל-ירעו ומים אל-ישתו: <sup>8</sup> ויתכסו שקים האדם והבהמה ויקראו אל-אלהים בחזקה וישבו איש מדרכו הרעה ומן-החמס אשר בכפיהם: <sup>9</sup> מי-יודע ישוב ונחם האלהים ושב מחרון אפו ולא נאבד: <sup>10</sup> וירא האלהים את-מעשיהם כי-שבו מדרכם הרעה וינחם האלהים על-הרעה אשר-דבר לעשות-להם ולא עשה:

<sup>1</sup> וירע אל-יונה רעה גדולה ויחר לו: <sup>2</sup> ויתפלל אל-  
יהוה ויאמר אנה יהוה הלוא-זה דברי עד-היותי על-  
אדמתי על-כן קדמתי לברח תרשישה כי ידעתי כי אתה  
אל-חנון ורחום ארך אפים ורב-חסד ונחם על-הרעה: <sup>3</sup>  
ועתה יהוה קח-נא את-נפשי ממני כי טוב מותי מחיי: ס  
<sup>4</sup> ויאמר יהוה ההיטב חרה לך: <sup>5</sup> ויצא יונה מן-העיר  
וישב מקדם לעיר ויעש לו שם סכה וישב תחתיה בצל עד  
אשר יראה מה-יהיה בעיר: <sup>6</sup> וימן יהוה-אלהים קיקיון  
ויעל מעל ליונה להיות צל על-ראשו להציל לו מרעתו  
וישמח יונה על-הקיקיון שמחה גדולה: <sup>7</sup> וימן האלהים  
תולעת בעלות השחר למחרת ותך את-הקיקיון וייבש: <sup>8</sup>  
ויהי כזרח השמש וימן אלהים רוח קדים חרישית ותך  
השמש על-ראש יונה ויתעלף וישאל את-נפשו למות ויאמר  
טוב מותי מחיי: <sup>9</sup> ויאמר אלהים אל-יונה ההיטב חרה-לך  
על-הקיקיון ויאמר היטב חרה-לי עד-מות: <sup>10</sup> ויאמר יהוה  
אתה חסת על-הקיקיון אשר לא-עמלת בו ולא גדלתו  
שבן-לילה היה ובן-לילה אבד: <sup>11</sup> ואני לא אחוס על-נינוה  
העיר הגדולה אשר יש-בה הרבה משתים-עשרה רבו  
אדם אשר לא-ידע בין-ימינו לשמאלו ובהמה רבה:

